

及教習並由派往之員與日本文部分別議訂延聘總期兩年之後即可直入彼之高等師範學校本科合計預備兩年本科畢業三年五年後即有高等師範可用優級師範學堂學科大致仿照日本高等師範學校編定惟經學諸子學爲我有而彼無羣經諸子國粹所在誠不宜轉使闕略但此乃我固有之學日後補習或於暑假內補習亦不甚難此項派往師範學生姑以百二十人計每年學費約需五萬金現經臣春煊等與臣經羲電商將來畢業選派出洋時何省學生即由何省籌費惟此時臣等雖意見相同會商定議所慮者學生出洋尙在兩年之後彼時設有異議此舉即廢於半途合無仰懇 天恩飭下總理學務處立案將來兩廣無論如何爲難此舉不得中輟庶於兩廣學務有所裨益謹 奏奉 硃批學務大臣知道欽此

陝甘總督崧奏甘肅文武學堂籌辦就緒酌擬章程請 飭部立案摺

竊於光緒二十八年二月先就省城書院改課策論算學一面籌款於省城南門外機器局傍擇地修造學堂委員赴南洋考察學舍課程規模延聘西學教習添購時務書籍暨應用各種儀器創辦大概情形業經奏明在案嗣據文武學堂提調即補知府楊增新詳稱文高等學堂自二十八年十月初一日開工起至二十九年八月底工竣計修造講堂齋舍客廳廳

藏書樓各房屋一百八十七間製造器具七百六十二件武備學堂自二十九年九月初一日接修起至三十年四月底工竣計修造講堂齋舍一百九十九間另修師範館房屋三十五間內外操場各一所製造器具一千八十九件計文武學堂共修房屋四百二十餘間器具一千八百四十九件工料等項切實撙節共用銀六萬三千五百三十三兩九錢一分七釐此修造文武學堂工程用款之實在情形也又委員教習學生執事人等即於二十九年九月初一日移駐新修高等學堂考取學生一百名一應學規悉遵 欽定章程辦理統計每歲額支銀一萬二千五百餘兩武備學堂因經費支絀招考非易即由通省標營挑選文理清順年力合格學生八十名各帶本營馬兵錢糧一分再由學堂津貼火食統計每歲額支銀七千八百餘兩文武兩學堂定額之外均有附課學生無論客籍土著官場子弟有志向學者許捐繳學費考錄肄業以廣造就計兩學堂每歲額支銀二萬餘兩製辦活支各款不在其內此文武學堂常年經費之實在情形也自開學堂以來奴才不時率司道等分赴學堂按課察看教習學生皆恪守學規蒸蒸日上曾准學務大臣調取甘肅學堂史學輿地算學各國語言文字各學生四名赴京業經考取收入京師大學堂分門肄業在案現在武備學生入堂未滿一年一切柔軟體操器械體操兵操卓然可觀此皆提調卽補知

府楊增新及幫辦卽用知縣劉春堂等稟承司道昕夕在堂督率稽察各委員教習等口講指畫勤苦異常始克有此效驗邊省人心質樸風氣初開倘能恪守定章始終不懈將來畢業必有蔚然可用之才此又奴才所期望忻幸者也茲據司道何福堃等開摺詳請 奏咨前來奴才覆查均係現辦實在情形惟學堂工程及經費銀兩係由藩庫釐局兩處隨時借支俟籌有的款再行撥還應請開單報銷免造細數清冊以省繁牘謹 奏奉 硃批該衙門知道單二件併發欽此

署貴州巡撫林奏開辦蠶桑學堂請 飭部立案摺

竊維農桑之利從古並重然以食爲衣者利有定以衣爲食者利無方故蠶桑之利視耕稼爲尤厚禹貢九州多以田賦蠶桑並列而於梁雍等州未之著錄後人遂有地土不宜之說不知天道變化不主故常幽原桑蠶岐山壓柘周人之詩已殊禹貢至於成都之桑蜀地之棉皆可爲梁土宜桑作證滇黔於古皆爲梁州之域臣前在雲南巡撫任內購種各省之桑已長成百數十萬株參用西法養蠶出絲可與江浙相埒貴州遵義樛繭亦係取山東之蠶用山東之法流衍布濩利被至今其非不宜蠶桑尤爲近而有徵臣去冬奉 命移黔卽沿途查勘土性雖沃饒稍不如滇而荒棄究屬可惜抵黔以後又查知前撫臣潘霽購種浙桑